

09/02/1999

Tentera diingat tidak mudah terpengaruh

KUALA LUMPUR, Isnin - Warga tentera serta kakitangan awam di Kementerian Pertahanan (Kementah) diingatkan supaya tidak cepat melatah atau mudah terpengaruh dengan dakwah asing yang cuba mempertikaikan kredibiliti kepemimpinan negara menangani kegawatan ekonomi.

Menteri Pertahanan, Datuk Abang Abu Bakar Mustapha, berkata tindakan musuh baru negara itu hanyalah bertujuan memusnahkan kesepaduan, keharmonian dan kenikmatan yang dikecapi rakyat.

"Yakinlah yang segala usaha kerajaan yang dipimpin Perdana Menteri, Datuk Seri Dr Mahathir Mohamad dan timbalannya, Datuk Seri Abdullah Ahmad Badawi, semata-mata untuk membawa kesejahteraan dan kemakmuran kepada rakyat dan negara," katanya.

Sehubungan itu, beliau meminta supaya warga tentera terus bersatu dan berdiri teguh di belakang kepemimpinan kerajaan serta bersama-sama mengatasi kemelut yang dihadapi ketika ini.

"Warga Kementah khususnya anggota tentera adalah benteng utama pertahanan negara.

"Maka itu, komitmen dan kesepaduan yang jitu daripada anda semua amat diperlukan agar negara kita terus menjadi negara contoh dan dikagumi oleh masyarakat dunia," katanya pada majlis perhimpunan pagi dan pelancaran Kempen Cetusan Rasa kementerian itu di sini, hari ini.

Abang Abu Bakar menegaskan tindakan anasir luar itu adalah satu bentuk penjajahan baru yang jika tidak dikawal, akan mengorbankan kemerdekaan negara yang dicapai hasil perngorbanan banyak pihak, khususnya anggota keselamatan.

Menurutnya, walaupun negara menghadapi kegawatan serius, keadaan masih aman tanpa rusuhan atau permusuhan kaum seperti yang berlaku di negara jiran.

(END)